

Entrante 1 di january 2014

Minister President Mike Eman encarga cu cartera di Inovacion, Ciencia y Desaroyo Duradero



ORANJESTAD(AAN): Minister di Asuntonan General Mike Eman a haya entrante prome di january 2014 un cartera nobo. Prome Minister Eman desde awor ta responsabel pa maneho y coordinacion di inovacion, ciencia y desaroyo duradero. E enfoka ta tambe pa promove desaroyo di conocimiento. Inovacion ta di importancia pa progreso economico y social. Tambe e mester haci e bida empresarial mas competitivo door di inovacion di productonan y procesonan di produccion. Pa loke ta solucion di problemanan social manera den salubridad publico, den suministro di

coriente, cambio di clima y nutricion, inovacion ta esencial. Prome Minister Mike Eman ta considera inovacion e yabi pa crecimiento duradero, algo cu ta evidente pa un futuro di prosperidad. Ta pesey mes cu inovacion ta un di e puntonan di enfoka den e programa di gobernacion di Gabinete Mike Eman II. Aruba mester worde converti den un 'Green innovation Center'. Maneho di Inovacion y maneho di ciencia ta bay man den man cu otro. Esaki pasobra den varios caso di inovacion, ciencia ta hunga un rol importante. Inverti den conocimiento y haci uso di e

conocimiento aki mester percura cu e capacidad inovativo di Aruba worde engrandece pa medio di un maneho di inovacion cu areglonan di subsidio y instrumentonan fiscal.

Vision di Gabinete Mike Eman ta pa Aruba ta sostenibel den tur loke e haci, por lo menos te na unda tecnologia ta permiti. Den su mensahe di fin di aña Prome Minister Eman a pone tambe hopi atencion y enfasis riba e topico durabilidad. Eman: "Ora nos a dreña gobierno na 2009, nos a haci un analisis di unda nos pais a yega den e ultimo 25 añanan: nos poblacion, e exito di nos

industria turistico, e aumento di nivel di bida y e GDP per capita. Aruba a crece for di 200,000 bishitante pa aña te casi 1.5 miyon y a expande cambernan di hotel for di 2,000 te 8,000".

E crecimiento y exito economico aki a tuma lugha riba un pais hopi chikito cu densidad di un poblacion di 500 persona pa kilometer cuadra, loke ta masha haltu. E tempo a yega pa reevalua ki rumbo Aruba tin cu tuma den e proximo 25 añanan. Ta cla cu mester enfoca riba calidad na lugha di cantidad pa expande economia di Aruba sin haci demanda pisa riba infraestructura y e recursonan natural y door di duna atencion special na promove un union social mayor na mes momento.

Aki Mike Eman a finaliza bisando: "Awe mas cu nunca, mas hende ta usa e termino "sostenibel", pero hopi biaha ta duna e nificacion simpel di "sobrevivi", "wanta cabes riba awa" of "no bay bancarota" na lugha di alcansa integracion di obhetivonan economico, social y ambiental riba termino largo y duradero. Prosperidad ta mas cu adkision di cosnan material. Prosperidad ta integra den nos calidad di bida y den salud y felicidad di nos famianan. E ta presente den e forsa di nos relacionnan y e confianza den comunidad. E ta evidente den nos satisfaccion na trabao y e sentido comparti di significado y proposito. Prosperidad ta depende di nos potencial di participacion pleno na bida den sociedad".